

Grønlandsbanken-ip Finanstilsynip nassuiaataani nutsertitami paatsuunganartoqassappat, taava qallunaatut allassimasoq aaliangiisuusaaq.

Grønlandsbanken-imi anngiortumik aningaasanik pissusissamisuunngitsumik pissarsiarisimasanik aningaasatigut pinerluttuliorneq akiorniarlugu suliaqarfimmi misissuineq pillugu nassuiaat

Aallaqqaasiut

Finanstilsynet maj 2018-imi Grønlandsbanken-imi, Aktiaatileqatigiiffik (aningaaserivik) misissuivoq. Misissuinermi misissorneqarpoq anngiortumik aningaasanik pissusissamisuunngitsumik pissarsiarisimasanik aningaasatigut pinerluttuliorneq akiorniarlugu suliaqarfimmi, tamanna aningaaserivimmik ingerlaavartumik nakkutilliinermut atatillugu misissuineruvoq. Misissuinermi ilaatigut ilaapput aningaaserivimmi navianassutsimik naliliineq, politikkit aamma suleriaatsit, sullitanik ilisimanninneq aamma illup iluani nakkutiginninnerup aqqissuusaanera.

1. Navianassutsimik naliliineq aamma eqikkaaneq

Aningaaserivik Kalaallit Nunaanni aningaaserivinni annerpaajuvoq, Nuummilu qullersaqarfeqarluni. Aningaaserivik qullersaqarfiup saniatigut Kalaallit Nunaanni illoqarfimmi minnerusuni tallimanik immikkoortortaqaqarpoq, Nuullu avataani kisiartaalluni aningaaseriviulluni. Immikkoortortaqaqarfiit saniatigut nunaqarfimmi 50-it missaanniittuni, KNI-p nunaqarfimmi pisiniarfiini (Pilersuisoq) kontomik pilersitsinissamut, aningaasanik ikisinissamut aamma tigusinissamut aamma kontoni nuussinissamut periarfissaqarpoq, tamanna Illoqarfimmi Nunaqarfimnilu Aningaaseriveqartitsinermik ingerlatsinermik taaneqartarpoq.

Finanstilsynet-ip nalilerpaa, Kunngaqarfimmi Danmarkimi aningaasalersuinerimik suliffeqarfimmi agguqatigiissitsinermut sanilliullugu, anngiortumik aningaasanik pissusissamisuunngitsumik pissarsiarisimasanik aningaasatigut pinerluttuliornermut imaluunniit peqqarniisaarniarnermut aningaasaliinermut aningaaseriviup atornerlunneqarnissaanut aalajangersimasumik navianaataa nalinginnaasumit qaffasissumut nalilerneqartoq.

Tamatumani pingaartinneqarpoq, aningaaserivik annerusumik aningaaseriviup nioqqutinik nalinginnaasunik neqerooruteqarnera kiisalu annerusumik Kalaallit Nunaanni sullitaqarnera. Naalagaaffiup avataaniittunik sullitanik pilersitsisarneq qaqtigoortuuvoq, aningaaseriviullu qullersaqarfiata akuersinissaanik piunasaqaatitaqarluni. Aningaaserivik aningaasalersuinerimmi nioqqutinik pisariusunik imaluunniit immikkut ittumik sullissinermik (private banking) neqerooruteqanngilaq. Aningaaseriviup oqaatigaa, aningaaseriviup sullitarpassui annikitsuinnarmik niuerfigineqartartut, kiisalu kontot aningaaserivimmiittitsiffiit aamma kortinik nioqquteqarnerit saniatigut pingaartumik nioqqutissanik annikitsumik navianassuseqartumik neqeroorfigineqartarmata. Aningaaseriviup ataatsimut isigalugu kalaallit tamangajaasa sullippai, sullitalu aningaaserivik kisiat aningaaserivittut attavigikkajuppaat. Aningaasanik nuussisarneq pillugu immikkoortoq, anngiortumik aningaasanik pissusissamisuunngitsumik pissarsiarisimasanik aningaasatigut pinerluttuliornermut aamma peqqarniisaarniarnermut aningaasaliinermut qaffasissumik navianassusilimmik imaqartoq annertuutut isigineqarpoq, pingaartumik nunap ilusilersugaanerata immikkut ittuq Illoqarfimmi

Nunaqarfinnilu Aningaaseriveqartitsinermik atuinissaq pisariaqalersimmagu, aaqqissuussaannermi navianaataasinnaasumik imaqartoq.

Misissuineq immikkoortuni arlalinni nakkutilliinikkut qisuariarnissamut pissutissiivoq. Misissuinerup ingerlanneqareernerani piffissap ingerlasimanera eqqarsaatigalugu, Finanstilsynet nalunngereepaa, aningaaserivimmi pissutsit annertuumik allangorsimasinnaasut.

Aningaaserivik peqquneqarpoq navianaammik naliliinini ima nutarsassagaa, sullitanut tunngasut pillugit paasissutissat annertussutisillu tamaasa naammaginatut aallugit, tamatumunngalu tunngatillugu sullitamut paasissutissanik nutarsaanissamut piffissamut pilersaarummik suliaqassasoq.

Tamatuma saniatigut Finanstilsynet Illoqarfinni Nunaqarfinnilu Aningaaseriveqartitsineq aqutigalugu aningaaseriviup sullissineranut, Kalaallit Nunaanni tamarmi nunaqarfiit 50-t missaannittuni najukkani KNI-p pisiniarfii aqutigalugit kontomik pilersitsinermik, aningaasanik ikisinermik aamma tigusinermik aamma kontoni nuussinissamut periarfissiisumut oqaaseqaateqarpoq. Aningaaseriveqartitsineq, aningaaseriviup aamma Namminersorlutik Oqartussat akornanni isumaqatigiissummik tunngaveqartoq, Kalaallit Nunaata attaveqatigiinneranut ilaavoq. Tamatumali aaqqissuunneqarnermini immikkoortunik imaqarpoq, anngiortumik aningaasanik pissusissamisunnngitsumik pissarsiarisimasanik aningaasatigut pinerluttuliornermik aamma peqqarniisaarniarnermut aningaasaliinissamut pinaveersaartitsiniaanermi navianaateqarsinnaasunik. Finanstilsynet isumaqarpoq, siunissami Namminersorlutik Oqartussanut isumaqatigiissuteqarnissami nutaami isumaliutersuutigineqartariaqartoq, pissutsit qulaani taaneqartut qanoq akerlilerneqarsinnaanersut.